

كلمة الرئيس محمد انور السادات

فى لقائة بممثلة نقابات

المهندسين والعلميين والتطبيقيين

فى ٨ أغسطس ١٩٧٩

بسم الله

اخواتى وابنائى

لحظة من أسعد اللحظات أن نلتقى فى شهر رمضان .. شهر الانتصارات وان نجلس تحت اطار العائلة الواحدة لكى نناقش اعادة البناء لبلدنا مصر بعد أن اصبحنا جميعا مسئولين مسئولية مباشرة عن بلدنا مصر .. لدينا قرارنا، ولدينا أرضنا، ولدينا مواردنا .. اذن لا عذر لنا كما سمعتمونى وكما قلت فى خطابى فى الاستفتاء أن الأمم العظيمة تبدأ حياتها القومية الشريفة من يوم أن تعلن استقلالها . باتفاقية السلام زال آخر ما كان يحمل صدورنا ويحمل اجيالنا ومستقبلنا تبعات واحمال كان لابد أن نجد الحل والطريق لكى نتخفف منها وننطلق فى اعادة بناء مصر

أحمد الله أننا بعد المعاناة الطويلة كما سمعتمونى أقول معاناة ليس فقط فى الماضى القريب انما أيضاً لألفين سنة قبل قيام ثورة يوليو، كما سمعتمونى أقول لم تكن مصر تحكم بابنائها كان دائماً الحاكم اجنبى إلى يوم ٢٣ يوليو سنة ٥٢ لالفين سنة من قبلها .. لم يكن هذا كافياً حقيقة لأنه ظلت اكتافنا وظلينا نتحمل أعباء الصراع العربى الاسرائيلى فى الواحد والثلاثين سنة الاخيرة علاوة على ما كنا نعانيه فى الماضى

من أجل هذا نحن نجلس اليوم وارجوو قد أصبحت المسئولية مسئوليتنا جميعا .. أرجو ألا تقتصر هذه اللقاءات على رمضان فقط وانما بصفة دورية فى النقابات أوفى الحزب أوفى الأرض الجديدة والمجتمعات الجديدة أرجو أن تستمر هذه اللقاءات من جانبى إن شاء الله

من جانبى إن شاء الله سأسعى لهذا أنا لا أعتقد أن هناك عملا اشرف من هذا العمل وهو أن نلتقى جميعا لكى نضع الخطط والبرامج وتبادل الافكار ونتفق على الخطط اللازمة للانطلاق ولإعادة البناء فى جواحمد الله كما قلت لكم اننا نستمتع به تماماً كما قال الاخوة الذين تحدثوا من قبلى بحق نحن نعيش الديمقراطية نحن نعيش مجتمع العائلة الواحدة الذى يسوده الحب .. نحن نعيش مجتمع القيم المصرية الاصيلة .. قيم مصر فى الاصاله .. فى الايمان، فى السماحة وأيضاً قيمها فى أنها أبدا مصر مرفوعة

الرأس عبر كل العصور .. قيم مصر فى أنه لا مستحيل على هذه الأرض .. لعل معركة اكتوبر ١٩٧٣ كانت نقطة بدء ومنطلق يرد على كل أولئك الذين ظنوا أن مصر أصبحت جثة هامدة لم تثبت مصر فى تلك المعركة فقط لنفسها أو عن نفسها للعالم وانما اثبتت أيضاً أمتها العربية للعالم كله وأعادت كل كرامة وكل اباة ليس فقط لمصر وانما للامة العربية كلها

اليوم من حقنا أن نجلس جلسة عائلية كهذه باستمرار لكى نضع الخطط للانطلاق كما سمعت من السيد النقيب عثمان نقيب المهندسين .. مصر فى حاجة إلى جهد كل واحد فيكم ولن تستطيع الحكومة أبدا أن تنهض باعادة البناء وحدها .. وقد سمعتونى أقول أنه لما ألمانيا مرت فى مثل ما مررنا به بل بأقسى فى الحرب العالمية الثانية وخرجت منها محطمة تماماً ومساكن ومزارع كل شئ على التراب فى عشر سنوات استطاعت أن تبنى ثم نحن نسمع اليوم أنها من أغنى دول العالم تأتى فى مقدمة الاغنياء .. هذا البناء الذى أعيد فى عشر سنوات .. قامت به الحكومة الالمانية؟ ابدا وحدها .. ابدا . الحكومة الالمانية مع الشعب .. وضعت البرامج .. جاء مشروع مارشال قوى الحافز عند كل انسان استطاع المواطن الالماني والمواطنة الالمانية فى عشر سنوات أن يعيد المانيا أحسن وأروع مما كانت

الفرد وطموحه وملكاته هوالذى ينقصنا .. مرت علينا فترة طويلة يجوز قتل هذا فى الفرد وفى الانسان من تأثير فلسفات استوردناها من الخارج وحاولنا تطبيقها هنا لأنها ضد طبيعة هذا التراب .. لفظها هذا التراب شأنه شأن حياته كلها

عبر الالفين سنة كما تذكروا اللى انا تحدثت عنهم والحاكم الاجنبى فى مصر أبدا لم تذب مصر فى أى استعمار اجنبى جاء إلى هنا سواء كان رومانى .. فارسى .. اغريقى والانجليزى والفرنسى .. كل ما جاء إلى هنا ممالك لم تذب مصر فيهم، ذابوا هم فى مصر .. دى خاصية من خصائص شعبنا حقيقة، اليوم نحن مطالبون أن نعيد البناء من أجل أجيالنا المقبلة أبناءنا وأبناء ابنائنا من بعدنا .. احنا مطالبين ولا سلطة علينا أبدا الا ما نحسه نحولدنا نحوتراب هذا البلد، ولا معوقات اطلاقاً من أى نوع كان وانما الفرصة مفتوحة كاملاً لكى ننطلق فى اعادة البناء كما تحدث الاخوة الذين سبقونى سواء أكان نقيب المهندسين أو الاخ نقيب العلميين أو الاخ نقيب التطبيقيين .. نحن فى حاجة إلى تغيير فى حاجة إلى تغيير حتى بعض عاداتنا وما أخذنا به أنفسنا

أشياء بسيطة مثلاً قد لا يلتفت إليها حد .. يمكن تكون بديهية من البديهيات مثلاً يسير نظام الرى عندنا الى هذه اللحظة

أن الفدان يروى بأكثر من ٨٠٠٠ أوبتصل إلى ١٠٠٠٠ متر مكعب سنوياً من الميه الحلوة . فى العالم كله لا يزيد هذا المقنن للفدان عن ٢٠٠٠ متر مكعب عندنا من ٨ إلى ١٠ ويزيد كمان فى بعض الاحيان كمان كمية المياه الزيادة هذه كلنا وخصوصا اخوتنا

العلميين اللى معنيين بهذا يعلموا أنها بتفقد التربة عندنا من عملية الاغراق دى وأماكن كثيرة جداً هنا فى ارضنا اللى كانت مشهورة بالخصب مياه الرشح اساءت لها لولا المشاريع الجديدة التى بدأت .. طيب لو استطعنا أن نوفر من هذا الذى يستهلكه للفدان الواحد وارسلناه إلى الأرض الجديدة سيكون الرخاء ملك كل مواطن ومواطنه .. سمعتم وتتابعونى خرجت لجميع انحاء مصر لارى بنفسى بعيدا عن التقارير ومعنى كانوا كل المختصين أن كانوا من اخواننا العلميين فى معهد الصحراء أن كانوا من المهندسين أن كانوا من التطبيقيين من الزراعيين من كل فروع النشاط .. خرجت للبلد وكما تحدث احد الاخوة النقباء قبلى أن ٩٦% من أرضنا لسه لم نعلم عنها شئ .. يعنى فى الـ ٩٦% من أرضنا وجدت تربة احسن من أى تربة فى مصر بل فى العالم أيضا بعد اجراء البحوث العلمية عليها. قد تكون دى فى الصالحية مثلا واهى دى فى حوض الوادى ما بين الاسماعيلية والقاهرة قد تكون فى الصحراء الغربية وشفنا هناك الوادى الجديد والارض الحمراء الممتازة .. قد تكون فى الواحات ... قد تكون فى الوديان من الصحراء الشرقية بدءا من النيل إلى ساحل البحر الأحمر فى سيناء .. فى كل هذه الاماكن .. ملايين الافدنة ، وعندنا بلايين الامتار المكعبة من الماء ليس فقط ما سنوفره أو ننتظر توفره من اسلوب الرى الحالى ابدأ .. ده هناك سمعتونى أقول ٦ مليار متر مكعب ميه بتذهب للبحر الابيض لأن التوربينات فى اسوان لازم تكون شغالة علشان تدينا الكهرباء فعلشان ما نوقفش التوربينات ويقف التيار الكهربائى بيروح هذا الماء

احنا بصدد ما تقوم به كل أمة شريفة بتبنى نفسها .. من ٢٠٠ سنة قامت الولايات المتحدة .. قامت ولا تزال إلى اليوم على سواعد ابنائها وبالجدد والعرق .. فعلا استثمروا كل شئ .. كل ما يمكن بل ذهبوا فى هذا إلى قهر المستحيل ولم يعد امامهم ابدأ مستحيل دا هو ما نريده عندنا واحنا غلطنا غلطة كبيرة .. هذا الخطأ هو اننا أهملنا الزراعة فى مرحلة من المراحل لما استوردنا المبادئ .. والمبادئ دى قالت لنا أن الصناعة والكهرباء والصلب هى أساس النهوض .. ده اساس ماركسى ما هو ده مطلوب فعلا .. انما مطلوب جنبه أو قبله الزراعة .. والزراعة لمئات السنين كانت وستظل اساس اقتصادنا .. لوانه وجه إلى الزراعة ربع ما وجه إلى الصناعة فى الفترات الماضية لما تعرضنا لما نتعرض له اليوم من أزمة فى الطعام لانه كما قلت لكم الارض موجودة والميه موجودة الجو والسما موجود والفلاح موجود والمهندس الزراعى موجود .. والمهندس العلمى اللى بيحلل موجود .. والمهندس من كلية الهندسة موجود .. البيطرى موجود .. كل فروع النشاط موجودة وموجودين بأعلى كفاءة ومستوى

طيب ما الذى يمنع هذا .. هذا هو سبب ما دعوتكم .. والحقيقة .. لكى نشغل نفسنا به لأن ده شغلى الشاغل

كيف نستطيع أن نبدأ نقطة الانطلاق .. انطلاق بخطط وبهدف أن نحقق لكل مواطن ومواطنة على أرض مصر رخاء

أنا بقول لكم هذا الكلام .. احنا ٤١ مليون .. أنا شفت الارض الجديدة اللي تصلح للزراعة والمجتمعات الجديدة ولكل شئ فى مصر .. فكان لكل واحد من ال ٤١ مليون رجل وامرأة موجود مكان لرخاؤه يتملكه ويزرع .. ويبنى أو يعمل فوقه مصنع .. موجود مكان لكل مواطن مصرى ومواطنة من ال ٤١ مليون .. هوده اللي أنا دعوتكم النهاردة والحقيقة اليه لكى نبحث كيف يمكن أن نبدأ أو كيف نصل إلى نقطة الانطلاق اللي ننطلق منها أنا بيحى على ذهنى فى هذا الوقت الانطلاقة الامريكية .. ليه .. لانه ده فى ٢٠٠ سنة عملوا اغنى واقوى دولة فى التاريخ .. وكل عمرهم ٢٠٠ سنة

لدينا هنا الامكانيات كلها .. كل شئ، لدينا الانسان قبل كل شئ وفوق كل شئ .. فيه الانسان المصرى المؤهل لكل هذا

كيف نصل إلى نقطة الانطلاق هذه ؟ لانه ما أخفيس عليكم فى هذه المرحلة كما قلت لكم لا تستطيع الحكومة وحدها أن تعمل شئ أبدا الاعتماد على الحكومة وعلى القطاع العام .. وتعيين الخريجين دلوقت ليس الا بطالة مقنعة طيب بطالة مقنعة والمصيبة أنه مش بس بطالة مقنعة وبيقول لى عاوز أكل ورفاهية .. طيب أكل ورفاهية بدون انتاج ما تجيش اطلاقاً

كل هذه الاساليب لازم نقعد النهارده جميعا فى مجلس العائلة المصرية وندرسه .. كيف ننطلق .. كيف نبدأ البداية الطموحة وطموحة جدا لانه المشاكل تضخمت وكما قلت لكم لا عذر لنا لان لدينا كل شئ .. كل ما يمكن أن يبنى الرخاء واوله أن الطعام لكل انسان ومستوى معيشة كريم اللي هو لازم يكون القاعدة الاساسية .. جميع مقوماته موجودة لاكثر من ٤١ مليون اللي احنا قلناها دلوقتى موجودة . النهاردة وحتفضل موجودة عندنا يا اما تفضل مركونه زى ما عملنا فى الفترة اللي فاتت يا اما احنا نأخذ نفسنا بما يأخذ العالم به

أنا عايزكم كل فى اختصاصه ثم أيضا فى الاختصاص الاكبر وهو العائلة المصرية لان احنا كلنا لكل اختصاصه لكن دا احنا كمان مسئولين أولاً وقبل كل شئ عن مصر بكل اتجاهاتنا .. بكل فئاتنا .. بكل أعمالنا، احنا مسئولين عن مصر .. طيب كيف نبدأ نقطة الانطلاق، هذا هو ما أريده وأردت أن تبدأ هذه اللقاءات فى رمضان بالذات لكى تستمر بعد ذلك ، كيف نبدأ بنقطة الانطلاق سمعتونى بأقول أنه فيه مشاكل .. مهام عاجلة .. المهام العاجلة .. سمعتونى بأقول أنها الدعم .. لابد أنه يروح لمستحقه .. الضرائب لابد من اعادة النظر كاملاً ومن الاساس وأنا فى يقينى أنه سيتضاعف الدخل من الضرائب عشرات المرات بدون أن يضر انسان

وطبعاً الدعم مش معقول

انى أدعم أوتيل بينزل فيه الأجانب وبيعد الليلة بـ ٣٠ جنيه استرلينى أدعمه ليه ؟ الدعم

ده لفئة من شعبنا القاعدة العريضة .. عايز أضمن لها مستوى لائق وكريم وبسعر مضمون، من أجل هذا الدكتور مصطفى رئيس الوزراء بيعمل فى هذه الناحية .. وزى ما احنا متفقين هذه مهمة عاجلة لابد أن تنتهى منها قريباً بإذن الله لكى نواجه مشاكلنا بجدية وبصراحة وبوضوح

الضرائب أيضاً كل عملية تتم لابد أن يؤدى عنها الربح فيها ضريبة كدة على طول، مش نستنى لآخر السنة على ما ييجوا يحاسبوا الممول بيطلع نفسه خسران أو بيطلع أن له فلوس على الحكومة

لكن لوفى كل عملية حتى الممول ناخذ من أرباحه زى ما هو ماشى فى العالم كله ده الدعم والضرائب .. المهمة الثالثة قانون الضمان اللي هوقلت أنه ده أساس من أسس فلسفة نظامنا بس ده مش فلسفة ده مصر .. ده ما يبأس واحد جعان فى القرية ما أنتم كلكم فلاحين وجايين من القرى وكلنا فى القرية بنحس ببعض وكلنا بنشترك مع بعض فى كل شئ .. فى العمل .. فى الغيط .. ولا فى الطمبور فى الدراسات فى الرى كله بنشترك كلنا مع بعض حتى فى الميت بنشترك، لابد من ضمان حد أدنى من الضمان الاجتماعى لكل مواطن مواطن على أرض مصر فى العجز والمرض والشيخوخة والموت ما شيين فى هذا

المهمة الرابعة والعاجلة أيضاً زى ما قلت أنا: اقتحام المشكلتين الأساسيتين الطعام والسكان والبنية الأساسية فى البلد اللي اتخربت نتيجة ٣١ سنة بنصرف على معركة ماهياش معركتنا لوحدنا ده معركة الامة العربية كلها ولما جاء الوقت وجنوا ثمرة من دماء أبنائكم وأخوانكم بتوع القوات المسلحة فى أكتوبر ٧٣ وخزائهم طفحت من الذهب مش لاقبين يحطوه فين ده بيفكروا البعض منهم ينزل انتاجه من البترول زى الكويت لانه شايف أنه مش عارف يودى الفلوس فين ده عايز ينزل الانتاج لانه مش قادر يفكر يصرفه ازاي ولا يستثمره ازاي

طيب .. والله كان المفروض أنه يبقى فيه تقدير لكفاح مصر واحنا ما بنشحتش من حد لا أبدا ده من دماء ولادنا رفع البترول أربع مرات ابتداء من شهر أكتوبر ٧٣ مش بس رفع البترول .. تأمين البترول العربى يمكن ما حدش واخذ باله من الحكاية ده لأن ما كانش يجرو واحد يعمل فى المنطقة العربية، ولما عمله مصدق فى ايران قامت عليه القوى كلها تكالبوا عليه وخلصوا عليه ورجع البترول تانى كما كان لا برضه ابتداء من أكتوبر ٧٣ زدوا الاسعار ٣ مرات وأممووا البترول بالكامل .. احنا ما بنطلبش منهم شئ ولا حنطلب منهم ابدا انما بس حنقول لهم باستمرار اللي أنتم عايشين فيه ده من دماننا احنا أعرفوا هذا وعلشان كده يبقى مكانكم احنا ما عايزين حاجة تانية

لدينا امكانيات نعم .. نعم .. لدينا امكانيات ضخمة جداً وكفاءات والانسان المصرى ذاته، لكن فى هذه المرحلة يقتضى الامر أن نجتمع جهودنا جميعاً ونشغل نفسنا داخل العائلة المصرية جميعاً .. كيف نبدأ البداية السليمة؟ أين نقطة الانطلاق السليمة؟ علما بأن كل شئ موجود لا يحول دونه أبداً أى شئ الا أننا نعرق ونخطط كويس وبعدين نبذل العرق .. يعنى مثلاً اللي راحوا عمرووا استراليا من بريطانيا

بريطانيا فى أقصى الشمال وجوكلكم عارفينه، واستراليا فى أقصى الجنوب جو استوائى وصواعق كهربائية وحر ورطوبة وتيفود . فيه مليون حاجة ومع ذلك النهاردة استراليا بتأكل العالم قمح وصوف ولحوم واللى راحوا اشتغلوا الاساس فيهم انجليزى من انجلترا . طيب يا ربي احنا بلدنا الوادى الجديد نقول عليه حر ده جو بلدنا مش رايعين فى الجنوب بقى مش حنروح قارة تانية زى دى من لندن إلى استراليا نعبر ونمشى من القطب الشمالى إلى القطب الجنوبى لا أبداً دى بلدنا، مطلوب روح الريادة روح الريادة .. أنه اللي يطلع ويعد ويصبر ويصمم والدولة .. من وراءه . إن الدولة حتعمل له كل حاجة لا مش حتعمل، الدولة .. أنا أفهم توصل له الميه للارض الزراعية تضمن له المواصلات .. أما ما خلا ذلك .. ده جهد الفرد .. جهد الانسان لازم يبذله وعلى قدر .. ده سنة الحياة اللي ارادها الله سبحانه وتعالى لنا .. على قدر الجهد بياخذ الانسان

طيب أنا عايزكم معايا جميعاً بعقولكم وبسواعدكم علشان نبدأ هذه الانطلاقة فى أقصر وقت ممكن وزى ما قلت لكم بدل ما احنا قاعدين نتخانق على الرقعة الضيقة والفدان بقى بالسعر الفلانى أوداخذ المدن المتر بالشئ الفلانى .. لا طيب ما عندنا برضه أرض زراعة وملك ومسكن أو مصانع أو أى حاجة لارضاء كل طموحاتنا فعلاً لارضاء طموحنا كله

وأنا على سبيل المثال لما كنت بتكلم مع الدكتور مصطفى عن أزمة الاسكان وكنا بنتكلم عن المدن الجديدة اللي حول القاهرة كنت باكلم مع الدكتور مصطفى علشان أى بنايات أو مشاريع جديدة نوقفها داخل القاهرة ونطلع إلى المدن حول القاهرة سواء فى اتجاه الفيوم اتجاه الطريق الصحراوى اسكندرية فى اتجاه الاسماعيلية فى اتجاه السويس

طيب من بكرة وأنا طلبت من النقيب عثمان نقيب المهندسين أنه أنا عايز أدى لكل نقابة منكم مليون متر .. تفضلوا .. واوصل لها الميه والمواصلات بس ده اللي على .. انما أنا بقى أقعد أزرع واقعد أقسم مش ممكن .. وقلت حتى للنقيب عثمان .. قلت له . نقيب المهندسين مش حديكم المليون بتاعتكم الا لما تخططوا للعملية ده وتبقى النقابة لكم أنتم ، ولا العملية ده شغلة مهندسين . طيب لوبدأنا بكره نعمل هذا طيب ما اتحلت أزمة الاسكان لوكل انسان فى أرضه بنى أرضه واحده .. أوضه بيتدى بأوضه واحدة لانها ملكه حقيقى بتاعته وعنده بيته وعنده الطريق والمواصلات بتتحل أزمة الاسكان عندى

بنتحل بأسلوب طموح ما هوش أسلوب .. أننا نقعد نستنى الحكومة ما تقدرش تبني فى السنة أكثر من مائة ألف مسكن لما تكون يعنى كل أجهزتها على أروع ما يكون ، انما الأوفر هوبتطلع مش تمام، اذا تولى صاحب البيت أو صاحب الارض هيعمله بربع اللى حتعمل به الحكومة

وكمان مش حبنى مائة الف مسكن فى السنة لا ده حيطلع الخمس سنين اللى جاية حنكون حلينا جميع أزومات الاسكان لان مش معقول أن واحد حيكون عنده أرض والطريق ويقعد ساكت أبدا، عايز يطلع ويقعد فى فيلته . موجود هذا فى مصر .. موجود أرض زراعية علشان الطعام ده لا بد أنه ننتج طعامنا ونصدر كمان لان ملناش عذر المية اللى ربنا سبحانه وتعالى أكرمنا بها النيل بتاعنا وهو أعظم نهر فى الانهار الاربعة العظمى ده أعظمهم النيل، منحة من الله سبحانه وتعالى على مسافة ٣٥٠ كيلومتر اللى هى طول محافظة أسوان .. من أسوان إلى خلف حدودنا مع السودان ٣٥٠ كيلومتر تمشوهم، على بحيرة ناصر أرض لم تزرع من قبل من يوم الخليفة ما زرعش فشوفوا الخصب بيقى فيها ايه؟ .. شفتها بنفسى، الروح المطلوبة روح الريادة ونقطة الانطلاق وده اللى أنا الحقيقة باطلبه منكم أنه الاجتماع ده بيقى تمهيد لكى تشغلوا انفسكم بهذا من ناحيتين .. الناحية الأولى المسؤولية الكبرى وهى أنكم أعضاء فى العائلة المصرية ومسؤولين عن العائلة المصرية

الامر الثانى اختصاصكم وما يمكن أن تقدموه لبدء الانطلاقة هذا والاستمرار فيه . زى ما قلت لكم لا يوجد من عملنا أبدا ولا أحنا مرتبطين بأى نفوذ اجنبى ولا فيه تدخل عندنا فى قرارنا لأى انسان أو أى دولة أو أى قوة .. ولا معقب علينا على أرضنا ما هو احنا بنملك وعندنا قوة وحرية القرار طيب .. ليه ما نخططش الانطلاقة الكبيرة .. الانطلاقة الكبيرة .. الطموح اللى بنحل من خلاله مشاكلنا لكن كما بنحقق ذاتنا وبنبنى لأبنائنا وأجيالنا المقبلة ويستلموا منا يكملوا هذا البناء

الصورة شكلها دلوقت صعب مفيش شك الطعام حتقول غالى لان احنا بنستورد حاجات كثيرة جدا والدعم انتم عارفينه مبلغ حوالى الف مليون جنيه دعم وعلشان كدة احنا زى ما قلت لكم من المهام العاجلة الآن أن الألف مليون جنيه دول بيروحوا لمن يستحقه، ولكنها ماشية بالاسلوب والسياسة بتاعة زمان يعنى فيه قصر

لا .. ما عدش ده .. نستطيع بتحررنا من الحاجات التقليدية أن نعمل بداية جديدة ده هوندائى لكم .. ندائى لكم وبانتتهز هذه الفرصة وانتم عندى النهاردة .. انتم سمعتونى فى الحزب الوطنى لما كان فى ١٠ رمضان تاريخ بدايته واجتمعنا قلت أن الحزب حيعمل بنك التنمية وعايز أعمله مشروع هذا العام باذن الله بحيث يعنى نبدأ فيه على طول باذن الله علشان نضمن هذا خارج تانى أقول لكم أنا باقول ده ليه لان اللى بنى المانيا موش الحكومة الالمانية كان الفرد بيروح إلى البنك ويستلف ، بيستلف دولار يطلع منه عشرة

ويرجع يسدد الدولار اللي استلفه يبقى لانه أنا عملت حاجتين اساسيتين كان البنك الدولي اللي عملناه

والحمد لله ده عملته أنا في سنة ١٩٧١ واليوم أرباحه بالملايين لخير مصر في النهاية و.. وعملت البنك الثاني اللي هو بنك ناصر بالاتنين مليون جنيه اللي سابها لي عبدالناصر كملت التبرعات في البنك، بنك ناصر بتاع التنمية الاجتماعية بيقوم بوظيفة رائعة سواء بالنسبة لتمويل الافراد أو القطاع الخاص أو بالنسبة للمعاشات .. بالنسبة للنفقة الشرعية ما عايش الست لما بيحكم لها تروح تتلطم علشان تصرف النفقة وتعد جعانة هي واولادها أبدا .. بتروح فوراً تأخذ الحكم والبنك يعطيها ويحاسبه وده الصح النهاردة أرباحه وصلت إلى حوالي ١٥ مليون جنيه في السنة .. عايز بنك التنمية ده انشاء الله كل من يريد أن ينطلق يقف من وراءه

بهذا نستطيع في أقصر وقت أن نقفز قفزات ضخمة على الطعام .. على الاسكان .. على كل شئ ، بنستطيع أن احنا نقفز

من هنا .. دعوتى لكم وأنا الحقيقة سعيد بالكلام اللي النقباء الثلاثة اتفضلوا بيه لانه واضح أن احنا ما بنخفش ابدا على أى حال في هذا الذي ورد .. أبدا يعنى سواء على مستوى نقابتكم مفيش خلاف على مستوى الدولة مفيش خلاف بيننا اطلاقاً على أى شئ مما قيل إن شاء الله في القريب حاطب من السيد رئيس الوزراء إن ولادنا اللي في الخارج يتبرعوا لنا كل واحد بـ ٢ دولار علشان هيئة التصنيع ودولار علشان بنك التنمية نبدأ في بنك التنمية برأسمال بدولارات، ما هواش جنيه مصر بس بالدولارات كمان علشان نبدأ بداية قوية جداً أن كل مصر بيشتغل بره تطلب منه ٢ دولار .. الدكتور مصطفى حيرتها لنا ده وأنا واثق أن احنا حنغطي اللي احنا حنغطيه باحسن صورة ممكنة لكن بيبقى دائماً أنه زى ما قلت لكم عايزين نحط البداية السليمة ونقطة الانطلاق اللي منها ما نقفش تانى ابدا أو ما نرجعش ورا سواء بالنسبة لحل مشاكلها أو في الطعام والاسكان أو بالنسبة للمجتمعات الجديدة أو بالنسبة لكل الافاق، احنا كلنا بنحلم بها وجميع مقوماتها موجودة عندنا

الليلة أنا يعنى لا استطيع أن اعبر لكم عن سعادتي لكم جميعاً لانه خلاص ابناء مصر في تجمع عائلي سمح كعادة مصر واصالة مصر بنتكلم في أمر عائلتنا اللي هي مصر بعدين لم يعد هنا من معوقات بتعمل ده سلطة وده سلطة وده سلطة لا ده الشعب وده الحكومة لا ده الدولة لا مصر

احنا كلنا قاعدين الحمد لله في هذا الجو العائلي، مشغولين بشئ واحد هو مصر

من أجل هذا الحقيقة أنا سعيد وفخور لان شعبكم حيظل يفخر بيكم وخصوصاً أمام الاقزام اللي حوالينا لانه لا يستطيع حد منهم أن يكون عنده مثل هذه الحصيلة من

الانسان ابدا اللى فى مصر . أنا فخور بيكم بلاشك وبلدكم فخورة بيكم بس تعالوا معايا
نحط ايدينا فى ايدين بعض ونوجد نقطة الانطلاق ولا نتقيد فيها لا بلوائح ولا روتين ولا
أى حاجة أبدا .. الأرض ارضنا المية بتاعتنا ما فى حاجة أبدا تقيدنا عايزين نقطة
الانطلاق السليمة بأرجولنا تعودوا إلى النقابات وإلى المجموعات بتاعتكم الصغيرة
تتدارسوا هذا الامر لأنه لى معاكم لقاءات مقبلة على ورق باذن الله تصلنى منكم كما
حنجهز علشان ما هو اسلم وما هى نقطة الانطلاقة السليمة، لازم نتفق عليها لانه زى ما
قلت لكم لم يعد الامر امر حكومة أو حاكم بذاته .. الامر النهاردة كله لكل مصرى ولكل
مصرية .. لازم يشترك بجهد و عرقه وفكره عندئذ نبني بناء صامد شامخ أصيل كما
كانت مصر دائماً وربنا يوفقكم

والسلام عليكم ورحمة الله